

楞嚴經精要經句

1、卷1：「汝等當知一切眾生，從無始來生死相續，皆由不知常住真心性淨明體，用諸妄想，此想不真故有輪轉。」

2、卷1：「汝今欲研無上菩提，真發明性，應當直心訓我所問。十方如來同一道故，出離生死皆以直心，心言直故，如是乃至終始地位中間，永無諸委曲相。」

3、卷1：「佛告阿難：『一切眾生從無始來種種顛倒，業種自然如惡叉聚，諸修行人不能得成無上菩提，乃至別成聲聞緣覺，及成外道諸天魔王及魔眷屬，皆由不知二種根本錯亂修習，猶如煮沙欲成嘉饌，縱經塵劫終不能得。云何二種。阿難，一者無始生死根本，則汝今者與諸眾生，用攀緣心為自性者。二者無始菩提涅槃元清淨體，則汝今者識精元明，能生諸緣，緣所遺者，由諸眾生遺此本明，雖終日行而不自覺枉入諸趣。』」

4、卷2：「諸善男子我常說言，色心諸緣及心所使諸所緣法，唯心所現。汝身汝心皆是妙明真精妙心中所現物，云何汝等遺失本妙圓妙明心寶明妙性，認悟中迷，晦昧為空；空晦暗中結暗為色；色雜妄想，想相為身。聚緣內搖，趣外奔逸，昏擾擾相，以為心性；一迷為心，決定惑為色身之內，不知色身外洎山河虛空大地，咸是妙明真心中物，譬如澄清百千大海，棄之唯認一浮漚體，目為全潮窮盡瀛渤，汝等即是迷中倍人。」

5、卷2：「佛告阿難：『汝等尚以緣心聽法，此法亦緣，非得法性。如人以手指月示人，彼人因指當應看月，若復觀指以為月體，此人豈唯亡失月輪，亦亡其指。』」

6、卷2：「汝心本妙明淨，汝自迷悶喪本受輪，於生死中常

被漂溺，是故如來名可憐愍。」

7、卷2：「阿難，汝猶未明一切浮塵諸幻化相，當處出生，隨處滅盡，幻妄稱相，其性真為妙覺明體，如是乃至五陰、六入，從十二處至十八界，因緣和合，虛妄有生；因緣別離，虛妄名滅。殊不能知生滅去來，本如來藏常住妙明，不動周圓妙真如性，性真常中求於去來、迷悟、生死了無所得。」

8、卷2：「云何五陰本如來藏妙真如性？阿難譬如有人，以清淨目觀晴明空，唯一晴虛，迥無所有。其人無故不動目睛，瞪以發勞，則於虛空別見狂花，復有一切狂亂非相。色陰當知亦復如是，---是故當知色陰虛妄，本非因緣非自然性。」

9、卷3：「性色真空，性空真色，清淨本然，周遍法界，隨眾生心，應所知量，循業發現。世間無知，惑為因緣及自然性。皆是識心分別計度，但有言說都無實義。」

10、卷4：「汝但不隨分別世間、業果、眾生三種相續，三緣斷故，三因不生，則汝心中演若達多狂性自歇，歇即菩提。勝淨明心本周法界，不從人得，何藉劬勞肯綮修證。」

11、卷4：「汝等決定發菩提心，於佛如來妙三摩提不生疲倦。應當先明發覺初心二決定義。云何初心二義決定？阿難！第一義者，汝等若欲捐捨聲聞，修菩薩乘入佛知見，應當審觀因地發心，與果地覺，為同為異。阿難！若於因地，以生滅心為本修因，而求佛乘不生不滅，無有是處。---阿難！汝今欲令見聞覺知遠契如來常樂我淨，應當先擇死生根本，依不生滅圓湛性成，以湛旋其虛妄滅生，伏還元覺，得元明覺無生滅性為因地心，然後圓成果地修證。---第二義者，汝等必欲發菩提心，於菩薩乘生大勇猛，決定棄捐諸有為相，應當審詳煩惱根本，此無始來發業潤生，誰作誰受。阿難！汝修菩提，若不審觀煩惱根本，則不能知虛妄根塵，何處顛倒處尚不知，云何降伏取如來位？」

12、卷5：「阿難！汝欲識知俱生無明，使汝輪轉生死結根，唯汝六根，更無他物。汝復欲知無上菩提，令汝速登安樂解脫寂靜妙常，亦汝六根，更非他物。阿難雖聞如是法音，心猶未明，稽首白佛：『云何令我生死輪迴、安樂妙常，同是六根，更非他物？』佛告阿難：『根塵同源，縛脫無二，識性虛妄，猶如空花。阿難！由塵發知，因根有相，相見無性同於交蘆，是故汝今，知見立知，即無明本；知見無見，斯即涅槃無漏真淨。云何是中更容他物。』」

13、卷5：「若欲除結當於結心。阿難我說佛法從因緣生。非取世間和合麤相。如來發明世出世法。知其本因隨所緣出。如是乃至恒沙界外。一滴之雨亦知頭數。現前種種松直棘曲。鵠白鳥玄皆了元由。是故阿難隨汝心中選擇六根。根結若除塵相自滅。諸妄銷亡不真何待。」

14、卷6：「彼佛教我從聞思修入三摩地。初於聞中入流亡所，所入既寂，動靜二相了然不生；如是漸增，聞所聞盡，盡聞不住；覺所覺空，空覺極圓；空所空滅，生滅既滅，寂滅現前；忽然超越世出世間，十方圓明。獲二殊勝，一者上合十方諸佛本妙覺心，與佛如來同一慈力。二者下合十方一切六道眾生，與諸眾生同一悲仰。」

15、卷6：

「空生大覺中 如海一漚發 有漏微塵國 皆從空所生
漚滅空本無 況復諸三有 歸元性無二 方便有多門。」

16、卷6：

「旋汝倒聞機 反聞聞自性 性成無上道 圓通實如是
此是微塵佛 一路涅槃門。」

17、卷6：「我滅度後勅諸菩薩及阿羅漢，應身生彼末法之中，——與其同事稱歎佛乘，令其身心入三摩地，終不自言我真

菩薩、真阿羅漢，泄佛密因，輕言未學，唯除命終陰有遺付。」

18、卷 7：「云何名為眾生顛倒？阿難！由性明心，性明圓故。因明發性，性妄見生，從畢竟無，成究竟有。此有所有，非因所因；住所住相，了無根本。本此無住，建立世界及諸眾生。迷本圓明是生虛妄，妄性無體非有所依。將欲復真，欲真已非真真如性。非真求復，宛成非相。非生、非住、非心、非法，展轉發生；生力發明，熏以成業；同業相感，因有感業；相滅相生，由是故有眾生顛倒。阿難！云何名為世界顛倒？是有所有，分段妄生，因此界立。非因所因，無住所住，遷流不住，因此世成。三世四方和合相涉，變化眾生，成十二類。」

19、卷 8：「阿難！一切眾生實本真淨，因彼妄見，有妄習生，因此分開內分外分。阿難！內分即是眾生分內，因諸愛染，發起妄情；情積不休，能生愛水。---阿難！諸愛雖別，流結是同，潤濕不昇，自然從墜，此名內分。阿難！外分即是眾生分外，因諸渴仰，發明虛想；想積不休，能生勝氣，是故眾生心持禁戒，舉身輕清。---阿難！諸想雖別，輕舉是同，飛動不沈，自然超越，此名外分。」

20、卷 9：「阿難！如是地獄、餓鬼、畜生、人及神仙、天洎修羅，精研七趣，皆是昏沈諸有為想，妄想受生，妄想隨業。於妙圓明無作本心，皆如空花，元無所有，但一虛妄，更無根緒。阿難！此等眾生不識本心，受此輪迴，經無量劫不得真淨，皆由隨順殺盜婬故，反此三種又則出生無殺盜婬。有，名鬼倫；無，名天趣。有無相傾，起輪迴性。若得妙發三摩提者，則妙常寂，有無二無，無二亦滅。尚無不殺不偷不婬，云何更隨殺盜婬事。阿難！不斷三業，各各有私，因各各私，眾私同分，非無定處自妄發生，生妄無因，無可尋究。汝勗修行欲得菩提，要除三惑。不盡三惑，縱得神通，皆是世間有為功用，習氣不滅，落於魔道。雖欲除妄，倍加虛偽，如來說為可哀憐者。汝妄自造，非菩提咎。作是說者名為正說，

若他說者即魔王說。」

21、卷 9：「汝等當知有漏世界十二類生。本覺妙明覺圓心體。與十方佛無二無別。由汝妄想迷理為咎癡愛發生。生發遍迷故有空性。化迷不息有世界生。則此十方微塵國土非無漏者。皆是迷頑妄想安立。當知虛空生汝心內。猶如片雲點太清裏。況諸世界在虛空耶。汝等一人發真歸元。此十方空皆悉銷殞。云何空中所有國土而不振裂。」

22、卷 10：「阿難！是五受陰五妄想成，汝今欲知因界淺深，唯色與空是色邊際，唯觸及離是受邊際，唯記與忘是想邊際，唯滅與生是行邊際，湛入合湛歸識邊際。此五陰元重疊生起，生因識有，滅從色除。理則頓悟，乘悟併銷；事非頓除，因次第盡。我已示汝劫波巾結，何所不明，再此詢問？汝應將此妄想根元，心得開通，傳示將來末法之中諸修行者，令識虛妄，深厭自生，知有涅槃，不戀三界。」